

湘綺樓全集

湘綺樓文集卷第六

長沙湘潭王闔運字壬父撰

哀誄

黃司使誄

并序

維咸豐十一季五月壬寅 皇朝贈布政使銜湖南記
名道員鄱陽黃君卒嗚乎哀哉夫自古功德之士浮沈
非一其哀榮于身後名實之副望者固已殫能畢慮沒
而無悔其有屈抑顛沛鴻毛于世懷奇不發永恨終結
者又將入獨行之傳稱數奇之祖雖長往而莫怨運數
有自然者也頃者天步艱難生於萬端而君曰宏毅之

材抗迹于斯代卒不克控萬里清天下屏而不用退而
不隱攝百里之宰任不滿歲將三千之卒力不再戰文
亦列于進士官亦躋于四品其身則若行而若藏其志
則若屈而若伸雖名彰于 天廷固君子身後之事也
殉流俗之末榮枉天下之奇材天固若是其巧乎夫大
冶鑄金而莫邪被不祥之名海水羣飛而龍蛇在陸古
人之生歟亦何多也往余與君蓋嘗疑之及君西行而
已曰衰絰煢煢在疚奄忽天枉至于永訣管人所云令
斯人獨歟悲夫悲夫旣聞 國家宏易名之典攷管將
謚必有作誄表之素旗又友之述哀也曾子之哭子張

弔也與哉遂竭昏瞽狀君行事事之所不能狀則悲之
深者也乃作誄曰

才實干世世不須才嗚乎黃君曷云能來維君之初奇
節永闕負此強項纏于卑位弃以六載用之五月勞心
博博民望素黻異輿特起實利嗟夫英英黃君奮與爲
徃驚志疇測猛氣未舉鞠躬中堅眴然一虎

皇嗟命帥征彼西方方舟岷沱梁澹順慶蠢尔凶徒犯
我前旃不介而馳如鷹如鷂鼓聲未絕旗鈴失響我陵
我阿化爲凶壤割項五體瞋叱彌霸焚紀萬柴忠骨不
化嗚乎哀哉生不利時乃躋蛾封惟我黃君屈伸道窮

如生之元其瞑其視魂歸母旁肅然千里嗚乎哀哉倚
閭何見見子孤柩素馬入門爲君跼踖管聞鼓角震盪
江風今來北隴寂寞山松人壽百季誰能獨久惟吾與
子念其速朽知我猶辱毀我爲親顯晦之迹蓋不在人
夙簪款勤良遊江漢閔默夜燭言歡言歎公榮簡寂未
嘗設酒與子忘飢坐必移晷觀生觀民淪胥其敝孰隱
可全孰功可遂庶幾一奮而遂長逝誰謂夫子謝我而
蹙嗚乎哀哉知己溟漠故鄉緜邈元扃獨歸伊古之道
竹陂來送非復生平交交黃鳥宛頸揚聲桐鄉高祠孝
侯大冢毅魄作鎮山川之重遺徽永振孤憤無發卷連

旃旒心焉長結嗚乎哀哉

羅季子誄

并序

羅芝字季子湘潭人也翰林侍讀學士修源之孫從九品世枚之子也羅氏世有聞人君之從父明經君汝懷篤學博菽蔚成茂績又專六書之故精四聲之旨君以溫潤之質屬弱冠之季探索許文潛心家論余與君世重契舊姻子弟之游忝曰兄事甲寅之秋常接談燕清言相酬如對瓊樹人事天枉二十五歲而隕明經君以訃至且曰子宐有述焉余尋君篆書崔子玉坐右銘一軸紙墨猶粲傷其盛業不終恨良會之已促乃作誄曰

漣水之瀕蒼蒼松柯百季之宅有鬱其猗昭聲令顯繁
實舊家榮秀不間稟玉韡華之子乘德育懿凝嘉抱經
懷墳淑慎爾儀幼服宗訓流芬清劭籀策揆深絕文宣
曜惟舊惟新有體有要猗歟叔重究萬窮冥條分六體
根據八經百世達者子又好之鉛握無輟矧況門師寒
煥雖移述作匪易身則戍削志堅金石攝提之秋適近
清揚曲尊道素謂我偕臧是節最暄杲杲其日齊扇未
捐文簞猶席子之傳傳複帽重衣茗無盡醖酒不傾后
食少詞約韻豐質羸溫然之語遂慰長飢四載逝遷今
茲曹始過里度阡人遐室邇聞子幽憂冀其藥喜同轡

將存俾余心易園中之桃窘雨初薦萋華必達霽則萋
然何期之子未壯而遘外生闊矣心望長帽嗚乎哀哉
慈顧之勤隕寶隨沙淒淒諸父發歎同嗟匪直文秀孝
友柔嘉匪曰家榦絕學萌芽膏明未融誰謂其煎龔生
之天倍徙君季冥昧福善疇謂自天卽棺掩魄開隧長
封俟余白馬迴道無從豪素遺文披帙尋篆逸札道姿
循環三轉忠告寓言良箴必薦無道已長蒙心瞑肱敬
佩金音長悲谷變紛華宴醕未習子情風塵契闊未擐
子形內養外養毅豹所爭誰謂蘭秀望春而苓烏衣之
游惟余是密青青子衿勞思何及子雖隔壤畱箴我規

我之累德聲詎子知初業未成熟傳可久嗚呼季子營魄在疚延望山阿裴回流水哀已送之僚幽陳旨嗚呼哀哉

王祭酒母鮑太夫人誄

並序

長沙王祭酒先謙既卜葬母夫人于先公之塋自撰懿言述爲季譜累德明哀感人天性閭運孤子也少依慈訓壯失瞻依譬猶桓山之鳥聞聲而獨悲雍門之弦未彈而先淚況其含悽悱惻追怨重深吹樹甚于皋風積惠多于秦獄生平承歡之事當季飲泣之由繆熙伯之造哀陸士衡之已歎伊鬱無吐情遣有窮者乎昔章夫

人之靈表但述摧傷劉子政之贊詞先陳明智原本孝思乃爲誄曰

昔有桓鮑實爲女宗令德丕顯克紹柔恭作嬪于王三母齋顓雖有長妣委政爰從相協厥家內外時雍子遭役遺已我御窮夙興承筐爨有其容嬰覲號咷顧復喁喁何有何無二紀祁僮汙可小康國有大兵元二之災萬室靡甯攜持顓沛勛訓家鬻胡天不傭有曜弗榮旣殲良子乃邁梁傾傷哉貧也斂正無羸叔墨其衰負米安慶猶不遑安六涉洞庭母則尸寶奄已耆齡耆齡如何荼亦有甘取經于楹遂騁趨排金佩玉直閣司監

文無虛奏士有指南亭亭特達烈烈焜焜鄰媼笄兒里
母按函觀養扶輿旣涕且談庶幾佑仁暮歲和耽朱輪
導仗白髮垂簪人之見之貴壽無極惟子知母中心慘
惻七天九殤空勞母力旣見其生悸而轉盡明明夜燭
泠泠朝闕日曩食貧寵觚之側啼飢泣寒環堵是塞昔
笑且瞋今悲更憶奈何冥冥亦從老息於乎哀哉先民
有言冥昧慶喜達士不介等之暮旦一蔽一通得半失
半貞操不移九變復貫息叢于身神周于算人所欣嗟
我無愉惋居康不怡知貧非患超矣賢母寄之遐觀釐
福我遠消遙仙館

丁文誠誄

惟十有三季四月甲申四川總督平遠丁公薨于位於
乎哀哉凡聖哲之功德必自視其歆然鬱其才而有餘
猶得志之或難竊微生之逢辰交當代之英賢拯橫流
而旣康竭菁華而遂褻維伊人之徐步特孤立而參天
逮爵位之穹隆藩西南而十季果克終其令名謂五福
之或全彼史褒而眾謫必攷迹而遂言夫孰知其孤衷
乃齎恨于重冥表美德于素旌曰竝世之莫先蓋功成
者有量而志隱者難傳懿青衿之肇升感達人之爭譽
允舊德而交通宜早翔于玉署當

顯帝之初服既寇枿之蟠互方側席于宏賁應闢門之
天籟選文館已爲階輟侍臣而奔禦嗟江介之傾覆延
淮河而昏霧惟沅潭之僻遠愚民牽于蠻聚吏閭弱而
惶怖士遷流而靡據顧空峇之無張亦命駕而趣忝感
仁嬪之一言遂起義而斯怒承通 詔曰練鄉惟曾丁
之克成曾選士于衡湘截粵餉曰祠兵公局促于巖谿
積貧寡之疲氓初指困而毀家終貸粟而靡應撲燎原
其已難率飢軍而轉行雖百戰而百勝實無功而無名
眾莫恤其孤危有 皇鑒之獨誠遽分符于岳陽俾騁
足于康平又狂寇之大來委新守曰空城結餘民曰信

義倏萬挺之訇轟方河沛之風塵 朝有皇而論帥彼
南師之弗北雖名將其猶戒獨單車曰赴急曾不顧其
危敗披荆棘曰立府驅市人而行隊厯二使其恢恢美
將吏之和會躋顯命曰受鉞參湘淮而並轡逮六傳之
紛馳遭二寇之內譟鳴鏑驚于近郊戎旃阻于河外朝
士駭于傳烽盧朮屯而自潰聞孤軍之獨進行八夜而
弗寐雖明知其蹶將壯當熊曰爲快逋寇情其天降皇
穹畏其忠懍彼曾胡之勤王旣請命而猶待固其智之
可及非夫人之所貴越齊魯之獲安撫黎予以其蘇聯
百吏以同心方千里而應枹有矯僞之乘傳馳輦下而

莫呵驚朝至而夕禽美執憲之無邪昭

三聖之平泮靖官府之敖虞誰自矜其搏鷙亦無畏于
鼠狐歎無禹而民魚嗟水行之失道慨河隄之漏卮請
獨任夫疏導躬負土曰親榘九龍跽而弗躍誠精靈之
感通顧須髮之霜皓豈侵官而好功喜安瀾之弗瀑凡
俗吏之所憚思沛然其遠到顧表海之泱泱胡鯨鯢之
跋扈託互市曰求通乃耀兵于五口登芝罘而慨然備
不虞而經歪造樓船曰橫海蔭千里之桑柘戢猛志而
請試已改督于西土當沃淫之久荒又虛敝而情窳危
上下之征利扇廉風而無覩惟黨人之騰訪惜二星之

不照徒撫拾于細故不務全乎體要陷文法以三禡賴
聖朝之弘保鑒重臣之瞻言翔焦明于雲表方柱石之
不傾何見愠于羣小厯三考而績熙遂丕變于貪暴始
爲藏垢之藪今有康衢之謠諒功成而拂衣何修短之
足弔營四海而曠觀孰惠國之如家逢此世之佞僂激
哲人之訐謨吁貪夫之馳驚固兩利于戰和謬發難于
求地又聞呼而失戈傷大役之驛騷悲不豫于咨諏抗
急疏而請使舉偏師曰伏波皇不照其深惠惟勇毅之
是嘉世乃保其愠憚譏出位之誕夸俾坐觀其淪胥枉
夕怨而晨嗟位徒極于優隆身不獲于榮華銜長恨而

蓋棺志不遂其奈何烏乎哀哉侍清塵于華陽忝邦政
之必聞憤慕辱之無从每對食而忘滄思環海之受兵
若羣螳之圍鯢願一奮夫鱗鬣出南溟而翼雲運造刻
之奇謀將請對曰密陳時冉冉而多留老浸浸其欺人
謂聖賢之無如何增志士之酸辛咎虎視乎南荒策緬
甸之必亾連天竺曰窺俄填二藏曰爲強眾聞言而驚
怖如河漢之無杭願懦夫其可立儻修甲而偕行譬屈
生之謀楚麾蛟龍曰津梁信斯言之可樂滋來者之哀
傷陟升皇而逝兮獨遺我曰棲皇慨奇人之難覲心每
念而如湯鳴乎哀哉惟曠世之高識能不累于一身容

穆然而深惠心泰爾而常欣實屈己目推賢好彥聖目
利民藹沈靜而汪洋若凜秋之又春文闇誦于過目菽
偶涉而如神惜見韜于世務眇標致于青雲夔流風之
可接亦絕代而無倫美知命之識微將守靜而歸真不
忍見而先訣猶枉餞于江津未五旬而告終何匠質之
獨存汎江淮而履霜遠送公于嚮門指必外目爲期猶
恐累于知人嗚乎哀哉

余世松誄

並序

蓋水碧金膏非几席之玩醴泉玉燭無時日之期物有
脆而始貞人有壽而非福若夫百季之志空壯于逝川

七尺之形遽從于短夜秀而不實咎歎顏生从而可求
今同戴子長沙文生余君佐卿湘州之英彥也季未及
仕展也大成識綜九流目營四海雖在閭巷名動侯王
嘗遊京師臨碣石與清流論臧否對宿將談兵謀張曾
諸公聳而異之志大才高忽然不樂言還閉戶思從鄉
舉覃精伏案誦同學科舉之文余嘗過焉嗒然據梧不
知披帷之有人也將及秋試遽嬰時疹寢疾兼旬溘爲
委蛻季甫卅有六於乎哀哉天與其才不與其命達于
九州之外而槁于一卷之內咎賈誼告終京師而論者
猶咎漢帝管輅知命洛令而正始尙獲秀才君之早夭

謂之何哉意者全其令名曰彰其琛貴不然何其酷也
修學于二紀顯聞于八季舊交宿名不無缺望猶率行
孤意不能獻酬羣心州之人又曰其私好余詩疑爲相
黨然君懲余之激昂而人被君曰輕淺優劣之際終莫
能明至于密室盡言臨牀親訣旣獨承于眷私故每言
而嗚咽未敢諡之乃爲誄曰

朗朗若士湘上之華族光清泰業顯存吾生也不遇外
而後嗟聞子初矜陳周與遊恂恂帖括黯黯潛修翕然
時譽望子瀛洲余之邁君于侯之門褐裘玉立舒輓蘭
薰彼美無度相逢日親夙有奇篇激揚忠孝乃捐故情

曰從吾好醞旨如醅沈思必妙余非皇甫君非周處盛
名響臻如頂霸楚直置青霄從容玉塵嗟名之來固身
之災在道彌斂任情則恢縱橫一室旁皇九垓時無伸
尼狂狷裁之前達偕論音聲相隨簪金未躍今劒思飛
衡門不棲遊曰寫慕東傾高李北友張周況有都護辟
之參謀素節猶堅海崖自返壯志不讐毛錐弗選聞雖
夜興揮驚日遠李廣後時馮唐方少羣帥釋兵公車晒
調萬里空遊一琴自嘯鍊剛繞指神工是使屈柳爲杯
人性難諧嗟乎佐卿再別而唉胡時之能疾慕心孔棘
不知我者謂我罔極羣書在帷一鎧熒室眾毀莫聞郭

王孔云親承後命歎息時人謂德難保勛曰日新褰簾
轉瞥初驚縣懌移晷之談精明朝徹於乎遂歿信神不
滅天固有期壽亦難知既有令名又負羣疵忽焉翩然
已謝世疑志大宇宙如何能究名者實賓來世弗又旌
子之能傷其獨秀兩賢不並羣雄必競及歿而悲得君
難更余豈避嫌少排譏評於乎佐卿逝矣無憾青山之
林童遊是蔭撫琴思賢停雲怨暗於乎哀哉

彭壽頤哀詞

咸豐八年春二月萬載舉人彭壽頤歿于江西省獄嗚
呼悲哉人之窮也旣非直道可行天之酷也豈有可違

之理況復鎮剛必折瓦全無恥懲慙勸烈奪貪褫鄙雖
極力已相竿終莫加于一从祖刑鸚鵡操戮虬須凶心
醜善推刃驚愚淒涼百世歎憤千夫徒受惡謚同歸大
途嗚呼悲哉君懷特秉厲皎秋霜少依聖化折節文章
署季公府罷計洛陽羣寇披昌

皇心惠眷發 詔老叟齊規保練枌社棧奔竿旗邁變
惟君倜儻深計雄畫守望通力丁氓浚柵財惟履畝兵
惟戶籍逋奸易種格義懷凶圖驅害馬旣蔭飛蟲孰云
莠桀穢我

皇風都號鷙鷹斐云盜犬曾無筆籌空嬰墨典加已飾

拒怙其貪，憮義形于色。春秋所褒，寒蟬勝臯。肺石姬條，
奏書巡撫，敢告貪饕。泄治多辟，伯宗盜惡。糞壤充幃，海
夫之慕。蘭生必鋤，況曰當路。黨錮收范，縲紲羈長。書辭
牘背，引諠公堂。權威不詘，壯志彌彰。堂堂十書，昌言數
過。豈不懷外，道存無悞。嘒霜天愴然，犀鬼破豸冠。嶽嶽
觸直阿邪，官鞭作刑。毒杖參加，色勃聲疾。欲令其啞，君
乃徐徐正容，無假淫威。雖炎國典，未地聞士。可殺叱
者何也？邦人沸動，直名霆起。乘輅馳遽，達章

天子臺蕉。縱伐磨甄，未理張湯。難退呂壹，終榮未聞。改
弭仍見，司刑含奸。積恨殲我奇英，嗚呼悲哉！北海孫生

空開複壁龔生引藥蘭膏世憎輕舛非勇鴻毛是擿突
梯積俗烈氣燄然如何斯人獨立無遷高情亮日勁志
橫山庸駭聾驚謂之寡識酷虐得志謂之綱弋人誰不
舛庶其努力豐城埋劍光照明星流血逆上寃赫庭檻
邈矣千載昭此憤聲睚眦著獨行遷傳俠士聶政匹夫燕
趙流涕矧其奇懷感激夜起過國裴回永慟之子嗚呼
悲哉

莫姬哀詞

歲在乙酉十有一月丙子長妾莫氏沒于華陽旣期余
在厯城追悼其勤爲文述哀其詞曰

恭聞周穆釋位升僊盛姬夕歿緣耳朝還亦有齊章託
邦敷女秦兵不來沒而建旅物微有感聲隱必倡如何
若人先我而亾忽忽經季回皇如失豈曰忘哀匪辭之
悉咎芙麗姬能甘獻食今我親之慕心如噎於乎哀哉
自子之來家道始豐今子之逝曰我御窮何有何亾孰
計其通當霜而葛或夕而饗酬子已泰命之不待離心
日疏寵忘其愛鬱鬱靡朝何已卒歲自此分張轟然顛
沛愛女西殂余焉東走委子荒宮日月伊久舍曰不思
在心在口惟懣焉歡誰知往咎南海之會期曰同心寒
瓊暑扇煙燧磁針九瀧看水五嶺延風船歌桂楫岸采

江蓉歸及秋深別當冬始夏口還書淮陽詠史夜憶衾
寒朝愁帶弛豈敢懷居不歸念子與子從君雙棲石門
不謀甌石但有琴尊爨餘理曲汲罷拈鬚顰眉辨篆龜
手繡紋風日常佳嬉遊每共臨水登山兒呼女鬪升樹
攀花陵霜采葑隔林煙語蕩舟雲送動必我偕遂游鍾
濯南州之彥有酒如淮子攝中饋遵豆旣齊爲俎孔碩
曰樂吾儕還棹東洲桃蕢桂實祠竈饒香酌春酒苾鐙
曼魚龍盤分棗栗亦旣母道猶從婢秩承陽百里或往
或來蜀葵含笑桐樹迎歸子之來矣如春在梅子之尻
矣如月照懷無已太康曰游京國嫡也翩然使子當室

唧唧歲寒煒煒影特還駕到門喜而自匿翠珠金綺弗
有私羸齊菹漿酒夙夜有程兩昏三嫁繫子所營施罄
有禮辦具無聲婉婉七季嚶嚶三女春榮隨風俄焉六
五月影窺庭桂香盈戶一月之離九秋未劇余馳三晝
及子生朝酒通饋味燭共花搖非余叩叩念子茗茗平
生適意今夕何宵自此復還城尻爰暨攜手鳳臺乃聞
蛟害山館沙霾市尻塵盭子又勤勞執箕擁簞家無常
盛心不恆甯霜摧五葉衰咎由生余知憫憫眾尙營營
自茲十載慶弔相并娥女再來湘樓重起婦請于婦子
又生子一畝之宮嘈嘈盈耳將營東山子心弗喜五經

三史寔佐殺青言念我勞亦慶其成西使余招淹歲徂
征始與子別黃花再榮禮殿敷筵琴臺擁佩鳩乳春深
雁來霜暖詩寄蒙茶書題綠菜婉婉相聞音塵不蕤路
長客久累重情多瞻塗子畏但渡余歌青灘擊汰白兔
緣坡花迎佩轉馬重香馱人患爲師余焉久鬱墨突初
黔陶松自綠況聞淵外已知天祝歸與歸與庶完我璞
齊遺重錦丁饋千金余還四壁子橐餘琛彭生之尾激
子義心傾貲濟急蕭然履簪安貧實難充隱維艱人心
不同子淚其潛逝將去矣南山北山良友微言復于靈
關巫峯嵌秀知余宿留卷洞雲開憶子徘徊重窺石鏡

三汜離堆已成維繫不念旋歸有帳尻融無家召靖秦
車旣空江沱不轉人必安尻余當蓬捲念欲舍家先立
割戀春還三日弗宿于家子嬰沈疾蒙犯風沙分當此
訣愛必前賒爲留一夕揮手湘涯盼也不羈如鸞俟笈
余長宗宮教之將嫁誰謂毆睨神遊墟墓屢舂屢生日
貽我禍禍之將至舂則禳之人之舂嬖或殃之俾子
安尻子又弗康謂子當舂吉夢爲祥其祥伊何維虺維
蛇敷腴其色常膳載加念我之遠則驅則馳君留女諫
子心不移天之抗子如弗子克頓之道路申之厲疾一
日免身三嬰臥簀人誰不舂子櫻此極余方高會琴瑟

謳吟望子之來酒滿花簪增塘置駟三帥勞心駸駸歲
暮杳杳塗深輟我侍奴遠從霜霰撤我文茵已章寵餞
誰謂子來其從驕煽子病方昏盜言孔薦梁山千里正
月寒颼臥輜咯血乞乳餽孩竟申子志生復來歸五芳
歡笑良宴嚙啗余懷故情謂同曩慶察子愀然疑猶在
病一夕一朝若思若快無復前恩徒乖後望雙情參差
如何弗諶余驕子病子望余深咎恭今倨後淡前甘猶
專內政曰益勞店每感君言才疏未密爲女辦裝獨持
刀尺金木皮玉絲纈丹漆百兩旣將願言斯畢子昔有
言當从君壽及其將从貪癡嫪連子肌如割我念如煎

血墳在地心窮恨天於乎哀哉六女喁喁厥愛勿從俾
留侍母曰典斂籠謂子不智何其善終生榮歟貴秩秩
僮僮嗟子之生南荒農女家饒穀帛闌喧牛馬呂公善
相云丁孤苦法不人妻榮于母父六歲寇興焚彼象齒
從姊俱竄俘于盜壘姊曰贖歸子幼且敏見喜盜妻遂
爲母子豺虎難依盜殺其妻出坎入窰逾墮于泥倡工
攜子被婦居奇教之總角不畫娥眉余賞一言傷心聞
樂子雖在賤顧瞻遼卓要曰樵汲眾歎子諾余果長貧
終身劬作糟糠命也孰妾而安余生傲世何子之歡來
驚七貴喧動羣賢子無憾矣余亦無慳我友楊兄令于

宣化言訪子居無人有瓦村舍爲墟新甿蓋寡長此無
家迎風淚寫咎季嬉戲剝棗竿橙葉煨銀杏蔓埽花藤
夢知門巷尋失溝塍餘生每話寤語誰磨二紀相將亦
風亦正忠已接人簡能容下事嫡恭勤立家融洽常自
潔清曾無驕假幼而失學長恥不能忘其生命已博虛
稱多心易激病所由興備諸茶苦庶得超登余家四愛
五季俱刈雖欲懲余余無所戒歟矣何言生何所賴或
謂子亡我文猶在於乎哀哉

帥芳哀詞

鍾氏女嫁未踰季忽然而天秋清孤坐感念生來諄以

悼之儻知余慟其詞曰

繫人間所不容唯速死而後安何卷然之弱女亦見忌
如芝蘭湛太阿于秋水翩驚鴻于逝湍旣神光之一見
非明者其誰觀諒知子之維余胡亟去而自殘幸積愆
之未深謝親愛之餘歡雖欲得而瑕疵邈輕舉而難攀
余所羨而未能乃邁子之孤鶩愛與妒其兩失獨留恩
而泣然於乎哀哉誄曰

王有寵姬五季不字從游桂陽徵蘭毓蕙誰謂非男喜
延親懿母愛子抱朝舖夕寐弟昆十四生也賤貧唯子
獨驕辯慧清真二母弗子余焉是親傲如雛鶴達比浮

筠六歲載途清能自潔纓玉盈閨端然履闥不恥敝屣
克酬錦纈自此泠泠灑如松雪詩書過目篆籀從心不
能竟學頗復幽吟露蓮池側冰梅院陰裴回自賞歡怨
何深遨嬉能幾葛覃成體入峽題詩升堂習禮企彼邦
媛成余家美福過聲浮譽高殃起鵲曉盡血膏熱長煎
旣無生理翻有塵緣九死不承歡暫歡誰云百世難
周一季於乎哀哉維子之才輕塵弱草假之餘論由于
國老太妃拂席褱衣送抱聲華雲起容光月皓維子之
德人思弗堪執筭旣見酌醴彌甘和于宛若勤于缶甌
屈刀爲鏡化枳爲柑盜彼令名遯于物化鼻惜夫傷姑

悲母咤猶復留思火傳薪謝季則長殤爵隆已嫁於乎
哀哉子之丰兮胡然而凶旣貽我慰不於我終昔傷十
起殉皇室中今不爾訣冰炭填胸於平哀哉父子雖恩
有乖有合議章與爾如響斯荅爾又從余江帆雲跋玉
樹明階珠光照篋誦言廿萬執禮三千雁峯參佛石室
希賢琵琶寫韻絹素驅煙懷此六莸同歸百年哀郢九
章詠懷八二恨與天長音隨笛吹每余夜歸臨池賞愛
霜暗鐙明花陰月碎逸響猶傳書堂永閉於乎哀哉湘
樓夜夜秋月皚皚居子十季一日千回看山履屋折檻
攀梅筇訶爾公今望魂來魂兮歸浙山川雨絕形公身

輕性存冤滅余亦超然子無恨別儻有冥知難爲俗說
於乎哀哉

嚴伯受甫哀詞

悲夫修名之累人兮胸粟脅迫逼竿兮其不可生戚栗
兮若在鬼幽震電雨襲兮倏爍冥蕩驟獫獫吾視聽兮
萬器嘯噉窳吾已聲橐束收使置側兮号願遯其不聽
幻詐攬媾而日新兮雖苟默而謂轟側匿兮風攪而燦
燎獨公兮泥弱而不可行騰蹕匡蔽兮謂我橫闥顛奄
息兮驥之不鳴橫逝決溢兮遏河已爲阮歸休兮椎劒
屈刃而無所成涕泣兮柔媚而恥自明增累兮而喪我

精鵬抗厲而不間兮，魑白足而謹迎。女歧閭而闕門兮，伯林抑墜而望朋。昏曖曖而耿炯兮，吾將耀夫沈局。剛介卓異兮，天魄婞立。綽約兮，洪頂超不顧世兮。讐所癭蓋一公兮，不暇瞑懷琬珠兮。久自羞山夜吟兮，窈無儔無聖兮。不化長寢畢兮，萬事眇靈之風兮。激浦春眇障袂兮，望美人巖厓欽兮。獨來往鶴遠跼兮，雄高掌隄思君兮。永余絕哽私縣兮，濡涕雪射干紛兮。刺天盤局足兮，不得前余之心兮。與君異傲獨守命兮，人間皇天馮生制時兮。剛士獨睨夫，舛威旣揮霍而長逝兮。黨人又已矣，奚爲余固知追戚之徽纆兮。固顛躓其柰何。

衡軒輕然乃舍兮悲公子兮則愚翻垂翅兮浙汜兮夕
弭節于辰陽鳳東西而悲鳴兮鳩鳥隨而奮吭鸞鷺尙
號吾後兮宜眾庶之譁張旣炫質曰駭俗兮反咎余之
苟生嗟夫君外其已晚兮來黨人之紛紛收美麗于幽
都兮思鬼伯之又曠匪達節無不可兮甯曰終而後甯
聊避俗之狺狺兮就玄壙曰塞吾聽

折瓊華兮未云暮日冉冉兮將就路怨公子兮不少留
沅溪靜兮湘又幽驂赤豹兮恆厓臨回風兮爾悲一出
兮一息橫四海兮旣歸揚龍漲兮洞庭枯山木青兮風
渡湖思美人兮夢離居援哀吟兮夜半雨悲公子兮獨

泉下與子游兮何有無欲招子兮不願居橫自決兮與
余絕登衡冢兮望八區蕙蘭播兮九野君思我兮重來
游

祭弔

弔朱生文

同治四季春三月望王闖運於真定逆旅逢同縣舉人
朱君之匱因目所攜之酒酌奠其靈而爲詞弔之

曰悠悠天地有生有名孰見其得但見其爭嗟余六載
再旅于京今逢朱子簪弔唐生惟子之里乃余舊鄉後
先同舉齒輩齊行生不相識死不相傷何心邂逅相見

道旁見子云何惟僕惟馬二羸負棺搖搖于野風吹綠
楊靈雨大灑回此曠懷潛然涕下惟此乙丑南士赴期
或困于漢或躓于淮惟余與子不顧而馳我生而返子
从而歸歸與歸與名身孰親聞子之來杭海通津父子
離別已病託人亦窮于藥亦徧于神藥不醫从神豈通
問遲速之期子又奚吝無恤無親于友于殯無畏不歸
余送子櫬余情好悲獨往無聊爰與之子爰暮爰朝雖
未相識髣髴而要河之瀾瀾江又滔滔慈親倚閭靡靡
怛咤寡婦在帷情念新嫁人苟有心魂斯無化曷其柰
何永襲長夜飲子一尊告子一言生不如从富不如貧

貴不如賤古有達人往來虛無以究其根嗚呼哀哉

祭常都尉文

皇十有八季十一月甲午誥授昭荃都尉兼文林郎常
君寄鴻祖載將行王閭運謹遣使致雞酒之奠告于靈
輅之旻曰於乎二兄曷其永歸我咎旅衡于常是依粲
粲門子有繡其衣政由仲父退而下帷溫恭允恪門內
怡怡維時先公晉殉封疆冢婦從姑烈凜秋霜羣寇驚
拜義聲洋洋君脫虎口深慟巨創天卹適孤爵列輕
車雖懷忮志實蒞文華維曾及彭奮起揮戈遂殲醜徒
藉手姻家君獨永懷功不必已因禍被恩何心青紫世

守楹書躬耕栗里進恥他途退期沒齒卅季儒服貧或
緼袍丹鉛不輟素志彌高霜鎗寫韻汗簡分條業勤陸
淞功兼鄭樵人或睨君是何老儒我獨加敬邦之饗孤
眾人貪天虎步龍嘘誰謂公孫癯守山隅旣不文通何
能達舍宅別居糝藜被褐六十無兒女未燥髮人窮
天窮奄然遂沒家門再盛君不與焉二叔諸弟歸仁涕
漣丁鴻讓國弘微反田懷此耿介何慙晉賢并撰縣圖
實資襄贊斜上旁行刊重補舛信有史良竟無職纂後
輩蜚騰并微遼遠金鄉龍口題詠誰傳孤吟莫和清游
眇然山川阻深楓林又丹與君之別俯仰廿季豈不載

馳親交半从處處堪悲時時自弭一身空在百齡能幾
君志已終余懷信鄙家無舊釀爨少清人憶君今歲寒
雨初春扁舟來過情話逾親清談而已蕭然主賓頗訝
衰頽誰知永公悔無一飯匪君之遽余亦闌珊一朝一
暮石門之游彼何暇豫歌曰挽君君宜早聞旣異曾侯
諒無微文申之此詞庶報殷勤微月旣落青瑣尙溫君
其來窺何勞我輪

碑

衡州西禪寺碑

夫聖之道也功存禮樂之外元之化也寄于威儀之表

禮樂所曰設教而教非堯舜之心威儀所曰攝眾而眾
非釋迦之體是曰龍宮象闕興自信心坐樹歛河還其
所息爰逮古德咸任眇因或大啟泐堂總乎萬部或尋
自茅把同于采椽然勝者常誼貞者恆久望厓有依心
之想向寂無不度之門西禪寺者衡州城西郭之蘭若
也始自有宋至于聖清道有污隆迹偶興廢有若心
印禪師者自傳祖益更廣福田敷坐曰講甚溪乞食以
資徒眾薤薤甫建物力未宏有若普明泐師俗姓劉氏
鄱縣人也早受具戒已契遐幽不務語言惟崇苦行西
指五臺之月南開普陀之霧滄風一食踐雪雙纏施眼

而入大藥斷臂已求正法稟師行屨十有七季而以事
在浮杯功歸面壁遊則王國還則祇園既涉名山言旋
本寺灑埽塵室安設淨筵見傳燈之欲滅感大宅之先
壞雖道不凝物無毀而無成而俗所寄心發信于見信
教夫法侶所依止苾芻所薰修者焉可已經函雨剝貝
樹風苓頂構烏巢阬傾蝮蜜者乎乃遂割損蔬齋悉鳩
檀施除萊緝宇因基架殿磨甄作鏡本自定心起閣承
雲殊非彈指且夫阿育之萬塔華嚴之七重皆運神功
何關己力斯則經歲二七輦縉千萬俱自銖寸造成樓
臺回帶鴈北坐纏衡郭松栽二寸手作甘露之枝魚陂

半頃澱爲潮音之岸棟館疏野雲煙杳冥龍子朝參林
兵夜伏不埽而淨無風自寒若乃地接南荒門瞻歧路
瀟湘水驛領嶠陸衝遷客北來始驚于投障王程南指
漸遠于望雲別衡陽而眇然尋荒陬而大玄如聞清梵
回首城隅感往世之難同信勞生之易役徙倚大道之
旁吟咏傷心之地望道門而詢遠近入精舍而歎清修
是知噀鼓開場白槌起定離俗入俗見心覓心孰謂一
塵之房惟踞胡牀之上高志所寄我有其緣普公僧臘
雖高精進莫量藏經千卷行課六時念佛祖之提撕懇
艱難之逸情將勒金石言告後來猥曰凡夫承于至請

樂總持之有記愧聲聞之無根曾寄經廊親對法食道
俗殊趣香火同緣遠惡僧虔留書麓山之寺猶賢靈運
未入遠公之門有見善才不希王坐也且普公開壇南
嶽受法千人牧伯翹心英彥赴響衡陽彭侍郎營度石
鐘願迎披剝一葉暫空雙樹仍來非夫確然之操四禪
常定甘守淨境不落福緣烏能上承明珠下垂法蔭
眞見道若此之隆哉然則劫火際天無災一室愛河成
海難波此岸永言悟感乃作銘云銘曰

南宗旣暢眞如代紹不有淨土豈安元眇一芥坐空十
方同照無作法相有見眞覺

其一

瀉山振鐸衡嶽開堂

龍象護汾人天覲光有曠茲宇背蒸面湘方貞桂樹比

潔蓮房

其二

塵劫遞遷石火俄起棟宇仿佛階基傾圯

有大汾人轉輪彈指蜚石平地接薨雲裏

其三

崩茨結

室對月安臺回雁右峙天馬左胎周除冰淨曾軒霧開

無風旛動不夜珠來

其四

爰初荒蒙蕭槭四合言從彫

飾諸天環沓道興由人因物非物發響鐘磬游思林樾

其五

留生記迹付滅忘情今覺往覺不晦不明汾言遠

矣靈山未崩將刻石谷如聞頌聲

其六

詔建定興鹿壯節祠碑

有定興名族曰鹿氏其先曰直節忠孝六代相繼祀爲

鄉賢世載其美紱冕所興 皇運二百篤生壯節君諱
丕宗字簡堂卽鹽運使君荃之季子文安教諭君泰吉
之孫也風儀頎偉禮孝自童減產萬金已宦昆從季卅
有五始已拔貢生教習八旗官學生又十二季議敘知
縣發貴州四季補施秉知縣葑遂厯開州修文龍泉桐
梓郎岱廳平越州已異績特薦升直隸知州仍補平越
黃綬委佗超翔州郡署安順府黔西州台拱廳遷知都
勻府再送引見聲聞于天以覲

宣宗克膺 帝心還省未上權守大定明季涖本官五
載底績道光卅季廣西寇興界連都勻羣情波駭奸民

朱何沟謀伺變乃設謀悉禽其黨同官貪功君依實上
幾獲讒謫已直得申威略始章院司賴焉奉滿加升銜
兼護貴東兵備道禦獨山之寇解麻合之圍六載靡甯
嬰疾辭任巡撫謂君以忠節之後宜僇力于艱難有感
壯心效之已夙咸豐五季台拱苗叛時新平遵義省兵
猶盛督撫憚發姑務解網君諫已示弱宜移勝兵長算
不從羣苗鵠義遂殺招安二官連奪州縣龍貴凶徒相
合來攻食盡援窮吏民疾疫帥厲壯義固守一稊躬犯
礮丸若門雷霆寇伏其勇咨且退舍會督撫來援疑君
虛張罷遣救兵奪其郡符七城皇駭三叛踊躍潛師夜

旋內完闕門六季八月朔夜半府城不守自茲浹旬九
城淪痛僉曰爲貴州之亂失機于此君當斥退之會無
官守之譏天開其生于義可全乃閭門積薪與繼妻恭
人福山蕭氏舉火自燔奴婢感義六人赴燄于是提督
孝順巡撫蔣霽遠感欽遣烈乃懷忠智奏復君官吏部
給襲禮部祭葬兵部賜卹國史立傳悉依三品官例有
詔聽許入祀京師保定都勻昭忠祠明季鴻臚寺少
卿王兆松呂鄉里公義追稱碩德與畿輔人士各合詞
論賢請于縣城公建專祠有 詔聽許自蕭氏附祀同
治七季貴州巡撫張亮基曰黔中士人追述吏政孤城

扞寇功烈昭睹請加 恩予謚所任十二各聽民祠同
舛奴婢併請附祀有 詔聽許謚曰壯節惟君稟沈深
之智流慈廉之化敖翔苗疆敷政優優懋疑禽盜風行
若神吏不出門弭歌洋洋循良之惠允合祀典繁豈哀
歟而官祠民祭與閭黨相望夙承高躅式瞻老成祇奉
詔書遠惟樂公立社之誼近依太常專祠之典棟宇
顯啟閑主徘徊咸告嗣子周咨羣彥謂宜述徽迹表之
後來是用伐石西山鐫詞麗牲銘曰

咨忠節輔高陽屈託謨竭忠貞祠巍巍明德昌傳六葉
繩其良起道長顯令望牧都雲奠蠻荒苗盜兵侮五常

臧弗庸坐受殃眵其憾志勇强生虎視士慨忼黔荼炭
始念功拜三疏名顯章列崇輿昭馨香眷舊里靈來翔
慶陰陰降在旁嗟我士跂其行求良迪作典刑

祖考適齋府君碑

清故湘潭縣學附生王君之碑

并序

府君諱之駿字適齋湘潭人也王氏之先厥有四族太
原之宗與周同祖初自汾晉遷于贛南迄明中葉復徙
衡陽嘉靖之間始居湘潭遂爲縣人焉王考曰厚德儉
節家道始隆適配先卒側室有子六人其四子卽府君
之父也係家承先不廢舊業府君幼秉穎慧篤寬和平

軀幹短削發聲洪遠研幾知道不問庶務自非聖哲之
典仁人之言未嘗妄出于口徹經其慮季二十六爲縣
學附生執經庠序思樂泮水身無擇行人無間言遭物
情阻深鄉俗傾播服畝之農不勤搔瓜之盜時至推誠
待人來求無厭乃弃賣田宅遷于長沙忠不逆詐施不
望報蓄道之途雖宏生計之資蓋寡管彥方遺絹猶化
媮薄長康見竊翻蚩拙悟古風不行丐已久矣晚歲貧
乏弓醫自給逢韓康于藥市養君平于卜肆曾不嗟爲
善之不穫言他人之負己無愠無悶坦蕩怡怡性好誘
導不遺賤陋貴無加敬窮必率禮童孺知其可親鄰里

見而增慕身卒之後二十餘載凡及見者稱述盛德皆
咨嗟焉至于親仁慕賢卹孤篤舊直諒曰規澆懦謙讓
以銷爭競身負債券而屢分同產之財家無宿舂而五
舉妻家之喪故人高其行不假爵祿而富貴也謂仁者
壽竟遠期頤季七十曰道光十二年五月十三日亥時
正命于寢葬善化一都二里牌之原配戴氏孝淑令儀
允昭嘉範曰府君不親煩細獨持家政奉敬無闕撫育
有成後十二年道光二十三年四月十五日午時卒季
七十有九葬合府君之冢禮也孤孫闔運不逮王父幼
復失父王妣是依常聞遺言永欽祖德夫儀式作碑稱

美慰哀古之道也彼服官歷階厥有常紀在野之彥史
臣無徵不有碑表奚其詔後先葬之次哀子士璠仰依
謙意靡敢虛褒孤孫讀朱公叔郭林宗之碑咸述德概
無徵事實傳世勿替而賢者無訾況我祖父遺行懿美
猶在人口又嘗聞禮經其誣祖是愚用是依實累詞爰
咨諸父申永極于貞文銜眷忉于終古其銘曰

我于湘蓋三遷於府君啟斯文匪崇華出自涓道不顯
耿後聞摘光耀追遠存惟幽宅負嶽麓封三版闕棟室
遵周孔合魂氣嗟昆仍永懷對

曾孝子碑文

先生諱侗字魯安湘潭人也自子與子受孝經于素王
其子華元亦克世孝縣宗天下蓋其後也先生幼而失
父窮居奉母柔色養志跬步不離母老喪明貧不能娶
櫛沐廁牖服事惟謹夜有命呼發聲輒在飢飽寒溫如
親所欲十有餘載事猶一日母又病末疾性尤嚴急轉
側疇痛終夜不寢卽每背負起行行坐數徙間論古事
慰說其意常至達旦鄰媼過焉乃鼻怕怕曰忘其病于
是誠感閭里皆助勤養母得其安已次得其暇矣弱冠
通論語孟子性命之學有友三人不慕俗儒冬夏一白
布單衣危坐授經身無緼裘容色無餒束脩壺酒已不

敢嘗有友母丁姥嘉憐苦孝每爲設饌包留脯果使歸
遺母貧而豐于養困而愉于色人之見之者皆號曰曾
孝子也旣而親事有終慎終追思卜葬期遠厝于郊外
朔望臨哭風雨省護皇皇如望望如已至于成墳焉學
士大夫高尚其道負販傭姬咨嗟其行孝乎惟孝美矣
盛矣惟先生姿度朴堅砥節礪行穎敏足曰成學迂誠
足以矯世少無師承能自得師信道執德秉志不同道
炎中爲縣學附生乃妻嚴氏生二子三女先先生卒窮
巷獨居人敬其閭雖原憲之捉襟見肘黔婁之覆被餘
足晏居溫溫樂有餘也

文宗初元 詔天下舉孝廉方正之士呂贊德治先生
允當其選辭而勿居嘗謂人曰事親守身生民之常親
終永戚又呂爲名吾不忍也屬世屯艱隱遯顛沛天命
不靈高季五十有七呂咸豐四季四月某日卒葬于祖
塋同方之人永懷哀悼追慕不置僉惟不朽之業援有
道立碑之文謂宜刊石表墓見述其德又十季嗣子傳
理呂諸生從征隴西論功留補四川道員加按察使銜
推 恩誥贈其父母一品階封縣中文學及鄉大夫議
曰先生巨孝當蒙褒異呂謙德雅志抑而勿舉今緣
朝典猥呂子榮夫舍大而錄細循例而廢典非 國家

意宜先從鄉舉乃後受誥于是詳奏孝行上之闕庭
有詔曰曾侗祀于學宮孝弟祠旋曰恩贈榮祿大
夫乃伐材衡山紀述盛事永爲民則其詞曰
孝德之本教所由生於乎先生身立名成受之自天厲
之于學布衣素衿人思是效

皇有遺碩鄉無隱賢身沒一紀焜焜煊煊疇咎彷徨民
識其兒封茲介塋曰式閭表

皇朝贈總督太子太保湖北巡撫文忠胡公祠碑

惟咸豐十一年八月壬午湖北巡撫益陽胡公林翼薨
于官九月壬寅詔下贈總督謚曰文忠入祀賢良祠

并命立專祠于湖北省城祀其功越明季同治初元
八月祠成四方來瞻永追丕績惟公在是邦多修扞艱
始踐其位江漢淪鋪而以一旅之眾迫戚數里之地僚
屬人吏莫在左右崎嶇危疑旁求自輔功敗而志不隕
機鈍而智彌淬屈心忍尤用宏茲賁荆榛自開日月再
朗經營乘時日闢百里斯公之勛爛然允昭者也創夷
在側兵革不息有指疆土鄰寇旣懸則九江居我吭險
用是無安舒之慮公目營四方虎視眈眈悉率軍賤越
竟而討凶徒間襲反欲敝我三犯三驅威震羣醜揚豫
驛騷罔敢撓斧五季克之而千里鏡流其在初治簡恤

厥都習亂之餘知藏鰥在公和恆居師克開民施深惟
本根惟均無貧時則有改漕之請助 皇宅命於計其
功凡爲民間歲省錢一百四十萬貫公庫乃增銀四五
十萬兩剔幣蘇困化爲富强增兵六萬商農不億糗糧
芻茭罔有不多若疇圻父薄違農父蓋兼其職以答我
顯皇帝謀鞠人之保居恭承 天休已迄于今公旣集
眾材爰推其心有技有彥惟若己有五行不齊眾心難
和歸公之仁人人自親用能內靖州縣外彰撻伐西拯
夔巫南援邵陽東復安慶北拒固始之盜又分屯揚州
兵播遠威蓋自賜履之所不及昔疆臣所不能守我

皇之所憤懣攘之剔之乃元勛之鴻圖也勤勞芟舍靡
有定處在官七季六季于外邁疾彌重馳驅彌亟逮奉
詔養疾言旋公府未及百日而天不憖遺斯所以震
帝心從民思永祀于萬季曰妥靈鎮邦者乎今修飾宅
廟上合

聖制四時烝嘗歡哀奉祠吏民奔走婦子如志列州聞
風將攷其典官文寅受大任敷同奏功久親盛烈永懷
濟濟乃糾合同僚各述所審刊石立銘以爲世觀其銘
曰

嗟文忠自衡靈膺臺任正鼎凝攬江漢江漢平告于

皇祚孔榮身不居後宮成瞻棟宇肅肅清象巍巍覺其
楹慶來思覲舊氓於戲懷昭德聲

欽差大臣文華殿大學士湖廣總督官文遣湖南舉人
王闔運製文

皇朝追贈總督銜調任山西巡撫湖北巡撫諡文節常
公神道碑

公諱大澹字南陔湖南衡陽人也其先家于東平明初
有常得者爲衡州衛指揮使嫡孫襲職故爲衡人焉一
門出將見聊城之勛五世爲卿曜離方之德祖育和含
道未仕考諱英瑚嘉慶己巳進士亦澹于榮職不願補

官公體山川之醕氣稟玉石之上靈鑿柱取書安弭習
禮由道光辛巳舉人癸未進士官翰林院編修充會試
同考官江西副考官荀崧通博寔稱國史之才伏挺深
奇屢監甲科之試 朝廷將宏綱紀嘉其清節乃轉山
東道監察御史遷工科給事中並巡視西城旋掌吏科
霜風擊隼初入殿中京輦避驄遂成謠諺公曰政崇寬
大吏漸叢脞宐剔百季之弊不驚一搏之奇所陳州縣
采買累民及巨猾陳序九等結黨橫恣諸奏並奉 嚴
旨依奏飭行簪筆含威外臺震悚五季正色四方風動
其遂以陝藩入覲猶承 詔獎陳謙既公獨有清聲汲

生復見不嫌戇語 君之明也臣之直也

成皇帝綜覈吏事多出內臣凡受知遇周歷列省公乃以京察一等授福建糧巡道海隅轉漕始用倪寬閩中賤詩不同靈運募成都之教授興嶺嶠之文學在官三季奏署按察使晉江洋盜脅附商民禽獲三百八十餘人公一一引訊具知其枉得情不喜曾氏有失道之箴平反多人盛吉泣斷囚之筆卽請總督釋三百餘囚雷雨作解日月垂照于公張尉今見其人遷兩浙鹽運司使仍留署任獄中積囚充滿案不時結日夜剖斷不遑寢食督撫怪其容悴交慰曰休公戚然曰盛夏將至溫

氣蒸染幽閉之囚相枕藉矣法不至於柰何弃之一人
病困又敢恤乎故曰慈惠之心行敏決之政理亂繩于
渤海霈時雨于潁川必得甘露降庭神禽在樹及乎升
車告公攬轡到官塗歌巷餞塞轅盈路未滿一借之情
反怨三遷之速矣吳越膏腴牢盆穰浩監司之職 國
朝尤重王陽廉吏不待點金郭況中庭自然稱玉公肩
以廉風被以齋服埽梁塵而縣絹斷綾帶曰續燈豈直
使馬如羊暫懷羌部酌泉明志高揖夷齊在浙二季歷
署布政按察兩司使兼杭嘉湖海防兵備道三司踐泣
卓有餘聲遷安徽按察使到未期月以母疾告歸終養

嗟指方歸求醫已迫長魚蒲伏得致其誠愿小正銜恤
猶依于終養蓋純孝所感三公不易者與服闋入朝
補湖北按察使夏首雄藩中流襟帶平塗七百北指崑
潼江路三千東連揚海暫思鄉國便登黃鶴之樓遠樹
風聲盡罷蒼鷹之吏遷陝西布政使漢京舊地八水分
流秦關大鎮沃野千里城外通濟渠者引南山之巖泉
作西都之隍界洽風千畹荷鍾龍興雲屋萬家挈瓶鴉
曉旣成蕪絕久思河潤公不煩徭役自出俸錢爰疏濬
堰遂引清渭膏渟黛蓄忽覩溟池農書民謠遠追樊惠
旋移任湖北俄授浙江巡撫

皇上之初元也封疆重任屏翰舊臣再履越王之城已
加申侯之爵于時承平久矣民力竭矣南山羣盜但困
飢寒季漢牧伯半成闢允浙江瀕連海島頓革華風下
車興教衣袵日戒復已忤備積廢軍政荒闕劫盜犯境
遂奏劾罷輟總兵官三員列營惕息而櫜弓不張持戟
失伍聞鼓聳之聲空思將帥探赤白之丸爭誅文菴公
心息于旃旄說窮于刀劒招降巨寇將圖善後已奉
命調湖北巡撫卽廣西羣賊方張之日總督出征之時
江湖千里曾無空壘東南羣帥惟知奔命雖犬牙相錯
而連雞不飛畫地限于雷池越境難于天塹公乃飭車

六月汎舟五渚設巴北之戍守洞庭之險

天子曰人情惟患民氣浮動 手詔敦飭且宜鎮物公

內籌軍實外戢國訛故得鴟義息心鴻飛安宅旣而燕
師開壁盧循乘檻精兵三萬釋冰而不戰甲楯五千棲
山以自保岳州者湖南之管轄逃寇之下路旣委之度
外不設防兵公所遣孤軍逡巡退守夾江分鎮徒據地
形虜馬飲流豈非天意周處之外援永絕汧督之城守
惻然率眾登陴二十餘日李陵三千之卒黃巾卅萬之
徒壞雲壓城焦煙崩土王堪持節無復上馬之心溫序
銜須唯聞三軍之哭曰咸豐二年十二月庚辰城破薨

于菴昌季六十事聞

天子憤悼曰江夏重鎮形勝要區專倚屏藩驚成崩圯
特贈總督銜照總督陣亡例賜卹入祀昭忠祠并建專
祠賜祭葬諡曰文節其子孫以騎都尉兼一等雲騎尉
世襲越明季冬十一月某日歸葬衡陽石門之原禮也
夫人同縣劉氏孝敬夙聞貧修鹿車之敬貴習紘紼之
禮同在官所並遭閔凶代妃摩笄呼天而變色襄城榆
翟同穴以旌賢忠節雙建嗚呼盛哉公芳蘭在握喬松
直上摘文泉涌下筆雲飛孝緒七略之編未嘗釋卷池
陽二頃之田常思止足大節嶷矣小德不踰旣

御題貞琬表著徽美餘悲纏于孤嗣盛烈光于家國是以言瞻大島卽留次仲之書遠指青松高表琅邪之墓
銘曰

常先相黃風牧絜勳裔載其休降我貞臣峻彼南嶽如甫之神蓋秀含藻據德依仁爰初揚華承明出入秉正青闥端言文笏數珍外臺十總條俗民無不懷吏無不服侯伯之任政荆攸寄

顯后求舊始命于浙天維未紐亂階維厲滔滔江漢曰俾思濟道否物極功枉業天赫赫文節焚衝是保偵壺則壘周防百道篝火起焰岷玉喪寶忠烈兩蹈淑儷偕

殉侯血灑地星曜雨隕民哀莫贖

皇心其震嘉謚史表弔廬官問嗚呼文節全節是歸陵
遷德留神存壑移寒柏千歲墳楸十圍鏘洋遺烈悽愴
圖徽

衡陽常氏家廟碑

惟同治十有二季秋常氏考廟于衡州城東北門之陽
乃修時事百禮有秩將將四宗言觀新宮相與議曰古
者公侯卿士之家有采祿曰處其子孫子孫則以承先
祖共祭祀爲孝自漢以降傳制浸變然代有開國及世
官相續異于編氓常氏之先自衛康叔孫封于常以邑

爲氏又曰黃帝垂衣裳而治天下其相常先蓋以官族受姓已來繼有達人其在湘承歷祀五百則我祖指揮使昭勇將軍翼戴明祖有左命之勛始由東平胙土南嶽印綬旌旆與明終始

聖朝重文迺有文節父子進士相承文節致命復有子殉忠孝煒煜顯宗褒焉並授世職登于四品與國無極又爲世家居不遷里田不易畝寵榮兩朝光光大門非夫先世之蔭功德之茂未有若斯之隆者也近制庶姓悉聽立祠宇已合宗族況我常氏自明有廟至今爲協營奉祠又咸豐二年詔書于府城建文節專祠

斯皆國典所公祀軍民所建立家廟之基其來久遠雍正初遷北門之衢庚午之灾棟宇弗存度宜卜吉斯閔乃啟仰瞻尊靈顧念艱難思厥負荷豈惟欣承而已惟夫新廟衢廷宏敞前設大墜戶鄉少陽東臨湘川西眺城邑流澤浩汗增福隱眇其神有那其人伊何乃刊祠麗牲曰詔虔虔

振威將軍荃提督碑

提督荃君諱明良字贊臣潞浦人也其先出于荃丁銘功作族漢順之世斑爲哮虎唐有伯蒼攻蠻義陵實清序水因爲縣人焉自茲曰後彰于譜牒曾祖嗣鎬受朱

氏論語翔聲縣學祖昌仁曰耆壽慈仁見敬州閭父諱
欽貶執稷供養謹身克孝君生而質直材力兼人山田
磽薄不贍于食負米百里獲倍其羣然獨有大志輟作
而歎咸豐初羣盜波迸敢犯大都巡撫張公頓節選士
咸懷觀望君乃毅然一見奇其魁偉遂補百長浮湘馮
漢多獲首虜拔把總曰疾告歸歲在丙辰大舉援江時
則有田千總興恕號爲驍果推君之勇請與俱行克萬
載袁州胸面四創擢千總並賞花翎自此名顯留江西
爲別將援樂安守邵菴攻光澤陷陳先登有眾三千久
役嬰疾民爲齋禱論功超進都司侍郎曾公統制湘軍

廣求熊羆不二心之士再檄從征大捷太湖冒礮追奔
火刃絕噬曾靜毅以介弟之貴躬吮癰之仁非夫絕倫
之勇孰能致此矣兩湖義師緣江轉戰曾不半載收安
慶廬江無爲巢和含山上功皆最積閱閱記名總兵官
褒號振勇軍聲旣雄懦夫思奮乘流輕進柵于石頭寇
乃逞其犬噬日夜雷攻穴地穿壕誓將併命勇者伏尸
恠者兇戾君獨當險所不移尺寸地中飛火沙土爲霆
守壘之軍俄而灰滅君爲火衝激騰身忽墮土壅腰腹
咸謂已外屬有天道震而復蘇然後知古人臥積火門
霹靂不足以言勇也惟君曰堅勁之姿加之以忠樸雖

口不言功而氣陵其上副帥曾公貪其干城患其強直
投艱于躬讓賞于人合圍二季有百其戰鐘山連城寇
檜石垣僞號爲天保地保峻于易京君赴鉞在前奏勳
在後乙酉之役佗地道者皆君所部然附于李臣典登
城九將君倡其誓然附于朱洪章知者謂君與羅逢元
龔掩其功眾惜其屈君不心其競全功旣成謝病辰陽
優游奉養忘封侯之貴舊勞形傷宜壽而凋季五十有
四光緒元年正月甲辰卒于里第其季二月戊寅附于
祖墓山向丙壬于是本府劉君以君兄弟三人兩爲國
殤老父幼子莫上功狀追惟咎年同袍之義有感今日

鼓鼙之思乃命所司書行考迹授意作文伐石龍關以
媿五谿銅銘之烈其詞曰

惟皇中興文炆烝皇鵷火作燿四海揚光矯矯虎臣蹶
起沅疆始奮一劒經營吳方踴城天驚地作雷礮百萬
解甲東南大康有賞弗居還褐于鄉旣孝于養亦慈于
喪建纛觀禮升我府堂簪穆二季磨山蛾門惟淑之人
夫知籲救君時西歸弭不及穀冒霧乘障如風吹垢神
鷹搏空其威雲覆國賴爪牙戶樂翁媼庶幾山藜不采
之祐如何斯良有祿無壽誰營祁連以示爾後

巫山神女廟碑

禮記祀典祠出雲雨之山天子秩之諸侯望焉巫山自
夏氏孟涂已來傳祀帝女瑤姬未知何代帝也有楚貞
臣屈平始亟言巫咸其弟子宋玉乃賤巫山山之名巫
蓋咸所興祀殷人重巫周人貴易記曰示不敢專以尊
天也巫易于後世當諫官謀議之職天子有事必進斷
焉非復禳祝奉祠之流楚之先爲文王師與隗同祖隗
卽夔也夔熊蓋傳巫咸之德言故文王受業焉三代之
道于是乎在帝女主山又在其先稽古神仕在女曰巫
周巫以男襲同女號非正典也帝女聖神通靈彰彰無
疑豈夫仙人羽化之流與巫之所以必取女者蓋以妃

后深尻尤好禱問設官專典然後巫蠱之禍無由而作
左氏莊生具言聖人主山川姓名備有典記自秦以來
絕不復傳生巫舛神後人惑之而宋玉之賤有高唐神
女小儒俗吏不通天人罔識神女主山之由莫察詩人
託諭之心苟見奇異肆爲詼譎山靈清嚴固不降懲然
不正其義而欲守土之虔祀弗可得已往者常說朝雲
之事其必曰王因幸之者託先王后長子孫之義以譏
楚後王弃先君之宗廟太故都遠襲巫而樂郢陳將不
保其妻子使巫山之女爲高唐之客高唐齊地朝暮雲
散失齊之援見困于秦至後作神女賤則不及山川專

以女喻賢人屈子之徒義各有取比興意顯今巫山縣東神女祠在篁篨山下山在祠東將五十里今城卽漢巫故治水經注言鹽水在縣東巫山又在其東青石洞有天星諸峯魁秀十二而祠宜近民附郭是宜先後帥守未嘗躬至康熙中故尙書王士禎奉使告江弭楫祠下徒歎其茅茨土垣顧莫能釐俗謬咎唐尙書白居易刺忠州時過祠悉除詩牌亦若有悟而未聞所以正之今季春雨澤小愆縣令許堯文禱其望之山應時甘澍迺具財用將新神祠閭運還舟泝峽謁夔守黃毓恩言高唐二賤之意黃守韙焉且曰此牧令所以正祀典定

民志祈福祥之大者也。因備釋宋玉二賤，曰：諗學士而述巫之義序之祠碑，係曰銘焉。其詞曰：

於穆瑤姬，靈嬋媧皇。受命主巫，尻山之陽。匡飾異俗，川德彌章。祀隆夏周，代遭虞唐。遐哉邈乎，不可尋詳。咸亦氏巫，忠貞景行。芊熊繼紹，茲廟堂神明所作。遐邇肅莊，除疑定沴。蠱禍不揚，遭秦暴蔑。祀事久荒，肅肅靈所寂寂。聲香閼徯，其神曰俟。姬姜維

清，有九攝提御衡。太嶽之裔，爰作巫長。稽古秩望，虔恭用將。選材繕室，立闕四方。巍峩篚簋，禋祀復昌。肅時雨若，神應如響。穀我士民，思遑用光。上攷虞沴，瞻言楚畹。

湯湯江流石林茫茫孔靜幽昭對越靈祥

王仲章碣

兄代功撰妹淑書妹瑤篆額

有清學士湘潭王君仲章諱代豐小名慶來王父君之
次子也家譜有聞眾所詳矣君天姿雋異緝熙光明曾
未歧嶷堂堂神秀六歲誦禮經受許氏字書貫識偏旁
九歲從游桂陽統彼兩髫翔行山介修柏之間見者嗟
爲仙童十歲篆書禮記四十五篇習公羊春秋始有撰
述之志桂陽陳侍郎衡陽彭尙書湘鄉左朝議老岡鄧
郎中咸所歎異以成人禮之十七試提學條對穀梁傳
四疑屈於不知竟不錄名長沙彭君申甫自道光初早

有文名聞君琦璋以女妻焉十九試經古弟二朱詹事
招覆諸經生例問本經乃令君獨擬江淹賦曰爲當無
所不習旣入府學遂補廩生攝齋大庠已參羣彥其年
被病垂死而蘇日益孳孜徧該經史成都新立經室憲
甄蜀秀從父觀允因留侍講贊衛環化暢揚高志同舍
百人莫不歡然議定視學釋奠之儀以習禮充鄉飲司
正在位大寮資其儀法又議駁吳御史立後之奏張侍
講大禮之議依據正經克厭羣心實而不茂超然善从
年二十有三微疾七日終于夔門江驛則光緒七年閏
月己未也赴至成都同學震悼加絰而弔者相向失聲

四方聞知靡不哀惜越明年四月戊寅歸葬本縣西鄉
桐坤之原未見其止終止于斯烏虜悲矣君多能博記
長于講論夙誦莊子有聖人之學作春秋經傳例表喪
服經傳學並老師所未達導微言于已絕四川總督丁
公將上之四庫表爲儒林自古經明業成未有若斯之
早達者也仲尼慟顏延陵號命將焉訴乎乃爲銘曰
聖遠術歧經明道昌無德不達譽髦斯英猗我令弟顯
顯俊望彬彬其文行行其剛夙宵仰鑽將統聖綱唯義
是從溫而能方弱冠大成遺彼聲香厭世識時忽焉褰
裳子裏其寶家失其良德音若存黃鳥在桑靈瞻二親

魄奠中鄉悲樂所生於來旁皇胡不少留俾我無相考
榮斯北養養茫茫

曾孝子妻嚴氏靈表

夫人湘潭嚴氏之長女字曰某其先自山西來遷致貲
百萬父諱友信已敦篤沈識有聞于邦夫人生習四教
孝敬婉順親慈寶愛慎難其匹于時貴族富室多攀淑
德賢父遠覽爲嚴相攸以同縣曾君諱侗孝通神明允
型厥室逮夫人季二十有三乃嬪于曾曾孝子奉母禮
終煢煢貧居偕屋而棲遲待米而饗飧夫人敬奉夫子
柔色率禮屏在家之華施執箕帚而服勤思慕先姑俯

誨所生夙夜劬心十有七載生二男長曰傳理次曰傳
甲女子子三人竝承慈義在貧忘貧造成家道始大其
門匪爵而重夫貴妻尊雖勿優豫見敬里人仁壽無徵
季四十道光二十有九季某月某日卒越明季某月某
日葬于某原又三季夫子病卒遺命別葬某原古之道
也又十季傳理已功加按察使銜爲四川道員援 恩
贈父母階封誥贈夫人爲一品夫人當設碑表遂爲斯
文鐫著堅石頌曰

嚴之改莊綴姓滋仍世紹隱德邈尙子陵淑恭之姿蘭
尸夙敬貴道賤榮歸浚孝行仁者久約我服我勞內外

潔清簞瓢何慕霸婦鴻妻其樂穆穆於顯夫人朝夕有
恪母儀既昭景命有終子孫蕃變受祿其充合葬非古
繫靈實照耀此貞懿乃作神誥

管太宜人吳氏神誥

太宜人陽湖吳氏之季女也高祖父龍應山西布政使
曾祖父祖修沔陽知州父子相繼竝起甲科祖父錫綬
四川某縣典史父諱賓涑雲南新平典史廉慎高潔不
污小官太宜人幼羅偏喪從父南夷性質明淑禮度自
天子然邊遠容止有都卷髮如簪謂之尹姑同縣管君
諱繩萊字孝逸曰文良慈信守令含山主婦闕位思服

采蘋黃鳥喈喈恭儉遠聞季二十六來爲繼妻六季生
二子二女咸豐初元給事中宗稷辰應 詔舉賢薦天
下奇才異能者四人今恪靖伯太子太保左公及含山
君長子晏同膺明選名聞九州同治初元威毅伯曾公
復薦遺逸晏弟樂又與焉則皆太宜人之所出免之水
火教之訓詞飭之仁義養之名材赫赫煌煌於常有顯
太宜人裊貞令之志袞順瓊之則思媚威姑爰逮女公
縣魚廉吏之堂提龔渤海之邦夫疾九載勤不告劬執
禮恭養姑膳有加龐女供膾季蘭湘魚克雙其美孝敬
愉愉不名長妾克誨以任後迺抗烈表襮其風克教育

子穆姜之溫惠班導穀克嚴克仁剪髻具食賢士式門
諸孤敷腴夏清冬溫進退衣冠克對于賓靡室靡朝後
息先興無德不報天休丕承晏試爲吏文在彬彬養于
棲霞惠流海瀕樂聞于才名譚巴蠻旣揖將軍亦有徵輪
二子嘉問歸善稱親在豫驕沖何富何貧如何不淑微
疾蛻捐旅于東昌素旄有翩季六十又七同治六季孟
秋七月日在戊寅卒于公館其明季某月某日葬我太
宜人吳氏于陽湖新唐鄉墓山則含山府君幽宅之
東同塋異藏從明志也太宜人初命曰古者不祔蓋不
忍先歿者之復見也含山君葬近三十季先宜人于氏

葬四十季體魄冥安不可目啟晏等欽奉慈訓咨度羣
儒順母氏之所甯綜精靈之遐迹昭告先考遂營封樹
列羸別葬漢儒嘉焉兆域相望宜有表睹于時樂具述
懿德思慕瞻依乃俾閭運作爲神誥詩云女士景命有
僕乃申頌曰

於顯延陵流芬于吳卓矣敬仲世紀齊都繩繩有子光
我二家雪白之性蘭芬有芽柔嘉維則代有終譽禮廢
復起子忘其孤纖紆組紉堇苴枌榆絜清階除飭飭閉
閭德隱斯顯有禋禘掄光臨二官委委蛇蛇品物咸亨
時順弗留言葬賢母于此陳北邦彥畢會東海駝驅伐

石南山誥黃襄胡子子孫孫宗德報勞

永興教官賀君墓表

道充中海內顯尚儒業湘桂人士道鄴承者莫不稱賀
氏三鳳君其伯也父諱朝坊丁酉拔貢生夙有文名次
子廷鑾逾一科復充選貢朝考一等官京縣有政聲咸
豐八季擢令大興典供京闈而君舉于南上都會試奉
父就養朝士榮之君諱廷欽字寅臣清泉人也能文謙
讓遂遂色養仲也開敏博識多通庭戶儒素詩書琴几
楹題有荆樹弟兄子孫硯田之句俗吏塵客見之灑然
東南兵寇俱還舊廬及傾乾蔭頽然遂老而講誦不輟

鄉儷彌恭布衣徒步望知耆宿性不耐襪故以教官注
選借補醴陵訓導喪終復補永興從容善誘語人恐傷
篤于友于型其子姓同治中子及從子復同升學世澤
相承君之教也季六十有八光緒十一年三月甲子終
于學舍便縣久荒今茲復盛家傳漢學邑有聞人君不
自功人知所鄉長沙弟子千里誄銘于是孤子仁源以
爲墓揭悲思碑鐫德行孰是醅懿而可弗彰乃伐石祁
陽表睹原道其銘曰

慶世習禮鄴宗蔚起三彥一苗兩鳳摩霄仲跪其驥伯
也還肄執其丹棗嗣子青佩疇儒不貧疇貧不仁旣仁

且壽以勸後昆

龍中允妻熊氏墓表

恭人熊氏諱小珠善化人也季二十有三歸于攸龍氏夫曰湛霖曰進士官詹事府中允加級封恭人父諱大淦隱德弗曜母畢氏長沙名族少失慈蔭與龍舊姻恃姑戴夫人爲母員來之際三歲食貧箕帚澣紉唯躬憔悴承事婉婉如影隨形及兄公宦成家門隆富夫登侍從翔翥紫微思媚尊慈弗妣燕逸季過三十但存弱女脫簪爲婢衣帛綦綦二妣諸子長成各當授室姑閱其夙夜恤其勞變固命攜妾聽漏京師若嬰兒之免母懷

簪然不知其榮樂也既行之後姑亦忽忽如有所忘戚
鄰見知者乃咸服稱其順孝矣 今皇四載國多溫疹
夫疾維幾旣窮醫禱賊而有間恭人暴卒同官命婦扶
服救喪或見其體青篋餘和鳩疑其代歿信爲烈婦已
而中允日差始聞其說噉然哭曰是或請代余其不忍
先余歿也知婦唯夫割情從禮然誠通神佑非恭人其
孰能孚之其卒之日則四季四月丙午也季四十有六
京朝鄉國欽贊徽儀倉庚啾啾聞如鳴鶴無德不讐於
乎美矣恭人居柔執謙勇于見義初爲新婦適女公有
殉夫之烈家人勸譬已獨默然乃待其引決親爲沐斂

曰人貴知心士各有志兒女之仁徒亂意耳故其知生
善必素所樹立然也驕穉妾媵慈如乳母妾亦親之若
其事姑闔門雍和三族敬焉既葬且墳夫哀未釋思所
表睹以視嗣音乃依漢典爲作神誥系曰

孝于舅姑而後當夫是謂婦順宜福之遐如何恭人長
集于枯再育不榮魂翔異都仁壽宵翳家國嗟吁孰知
其然賢固有殊彼穀菽老貴蕃廡實陋且愚沒而一
此既有令名華廡弗居翩其坐遷留訓列圖非向孰傳
揭此墳隅龍有達者來視典謨

湘綺樓文集卷第六

桂陽陳兆奎校刊